

Paonori Corintoquë ya'huëpisopita ninshitaantarinsò'

**Imapisopita yonquiaton,
nanan a'patërinso'**

1 ¹Ca Paonoco ninshitantaranquëma'. ¿Noya canpitanta' ya'huarama'? Noya canta' ya'huarahüë. Yosë nohuanton, Quisocristo acorinco nanamën a'china'huaso marë'. Iya Timotioro'co nanan a'pataranquëma'. Corintoquë ya'huëramasopita ninshitaranquëma'. Yosë nohuanton, canpitanta' huëntonënküë ya'conama'. Acaya parti nisha nisha ninanoro'saquë imaramasopita yonquiatënküëma', ninshitaranquëma'. ²Inaora nohuanton, Tata Yosë catahuainquëma'. Asanocancainquëma'. Siniro Quisocristonta' inachachin catahuainquëma'.

**Paono parisitaponahuë',
Yosëri achinicancaninsò'**

³—Ma noyacha Tata Yosëso paya. Siniro Quisocristo pa'pin inaso'. Na'con nosororinpoa' ni'ton, catahuarinpoa' chiniquéen cancantahuaso'. Nani tahuëri inasáchin achinicancaninpoa'. ⁴Ma'sona tëranta' onpohuatëhua', ina catahuarinpoa' noya cancantacaso marë'. Achinicancaninpoa' ni'ton, canpoanta' nanitarihua' a'napita catahuacaso'. Inapitanta' ma'sha onpohuachina', achinicancanarihua'. Yosë catahuarinpoaso pochachin inapitanta' catahuarihua'. ⁵Quisocristo imarëhuaso marë' a'napita aparisitërinënpoa'.

Aparisitoahuachinënpoara, Quisocristo chachin achinicancaninpoa'. Na'con na'con aparisitoahuachinënpoa', na'con na'con catahuarinpoa' noya cancantacaso marë'. ⁶Canpitanta' Yosë nohuítacaso marë' a'chintërainquëma'. Ina marë' aparisitërinacoi. Parisitapiraihuë', Yosë achinicancanincoi ahuanta'huaiso marë'. Yosë catahuarinquëma' canpitanta', tënai. Parisitopiramahuë' achinicancanarinquëma' quiya pochachin ahuantamaso marë'. ⁷Canpitanta' aparisitoahuachinënquëma', Yosë catahuarinquëma' chiniquéen cancantacaso marë'. Napoaton co Yosë a'poaramahuë'. Chiniquéen cancantatoma', imamiatarama', tënai. Ina marë' noya cantantërai.

⁸Parisitëraisò' sha'huichinquëma', canpitanta' nitotoco'. Asiaquë ya'huasocoi, na'con ma'sha onpotërinacoi. Co ahuantochináchinhuë' cantantërai: ⁹“Chiminapoi nimara,” topiraihuë', co chiminaihuë'. Yosë nohuanton, ma'sha onporai ina na'con na'con yonquica'huaiso marë'. Napoaton “Quiyaora nanitërai,” co tënaihuë'. “Catahuacoi Siniro, co quiyaso' nanitërai huë',” itërai. Yosëíchin ya'ipi nanitaparín. Chiminpisopitanta' ananpitaantarín, tënai. ¹⁰Pi'pishachin shichiminpiraihuë', Yosë na'con catahuarincoi ni'ton, cha'ërai. Nani tahuëri ni'sárincoi. “Co onporonta' naniantaríncoihuë'. A'na tahuëri parisitaantapiraihuë', nicha'ësaríncoi,”

ta'toi noya cancantërai. ¹¹Canpitanta' quiya marë' chiniquën Yosë nontoco' catahuaincoi. Na'anquëma' quiya marë' Yosë nontohuatama', Yosë catahuarincoi. Ina quëran canpitanta' noya cancantarama'. “Ma noyacha Yosëri catahuarin paya,” ta'toma', “Yospa-rinquën Siniro,” tosarama'.

Paono Corintoquë yapa'ninso'

¹²Yosë ni'sárincoi ni'ton, no'tëquën sha'huitarainquëma'. Co pi'pian tëranta' nonpintërainquëmahuë'. Noyápiachin cancantatoi, ya'ipi parti a'chinai. Co quiyaora yonquinëhuëi quëran a'chintërainquëmahuë'. Yosë inaora nohuanon, catahuarincoi ni'ton, noya ninai. Ina marë' noya cancantërai. ¹³No'tëquë-náchin ninshitërainquëma'. Co nisha nisha yonquirahuë'. Co yanonpintërainquëmahuë'. Iso quirica nontohuatama', yonquiraiso chachin nitotarama'. Oshaquëran ya'ipi nitotarama huachi, ténahuë. ¹⁴Ipora noyamiachin nitotërama'. Siniro Quisoso o'mantacaso' tahuëri nanihuachin, noya cancantatoi, noya ni'sarainquëma'. Naporo tahuëri canpitanta' noya ni'saramacoi, ténai. “Paono noya a'chintërincoi ni'ton, imarai,” tosarama'. Ina yonquicamaso' nohuantërai.

¹⁵⁻¹⁶“Noya ni'sarinaco,” ta'to, i'hua nicaponquëma' yapa'pirahuë'. Masionia parti pa'pato, nira'inquëma'. Ina quëran o'mantahuato, nirimanta'inquëma', topirahuë'. Inaporahuë naporini, canpita catahuaitomacohuë' Cotia parti paca'huaso'. Catoro' ni'nanquëma' naporini, noya noya cancanchitomahuë', ténahuë yonquiato. Napopirahuë', co pa'nahuë'. ¹⁷Napoaton: “Paono nisha nisha yonquirin,” ¿topiramahuë' ti? Co nisha nisha yonquirahuë'. A'naquënso' ma'sona tëranta' sha'huipirinhüë', co

tëhuënhachin naporinhüë'. Co caso' ina pochin cancantërahuë'. ¹⁸Yosë ni'sárinco no'tëquën nontëranquëma'. Yosë no'tëquënáchin nonin ni'ton, canta' co nonpintëranquëmahuë'. Co nisha nisha nonahuë'. ¹⁹Iráca Siripano, Timotio, ca, caracoi a'chintërainquëma'. Quisocristo nanamën a'chintërainquëma'. Inaso' Yosë hui'nin chachin. Co onporonta' nonpintërinpoahuë'. No'tëquën nontërinpoa'. ²⁰Ya'ipi Yosë sha'huitërinpoaso' Quisocristo acotarinpoo'. Napoaton “Quisocristoso' no'tëquën nonaton, catahuarinpoo'. Ma noyacha Yosëso paya,” ténëhua'. ²¹Yosë chachin huëntonënuë aya'coninpoo' Quisocristo imacaso marë'. Huayonatonpoo', acorinpoo' piyapinënpita nicacaso marë'. ²²Hui'nin pochin niconpoo', sichoquë marca acorëso pochin Ispirito Santo aya'coancantërinpoo'. Hua'yanën chachin aya'coancantërinpoo' ni'ton, anitotërinpoo'. “Ya'ipi sha'huitërinpoaso' chachin quëtarinpoo’,” ténëhua'.

²³Ya'ipi yonquirahuëso' Yosë nitotërin. Ina ni'sárinco ni'ton, no'tëquën nontaranquëma'. Co nohuantërahuë' canpitataquë chiniquën pënëna'huanquëmaso'. Napoaton co i'hua ni'conanquëmahuë'. Naporo' pa'nahuë naporini, co noyahuë' ninamaso marë' chiniquën pënëna'huanquëmaso' ya'huë'itonhuë'. ²⁴Co quiyaso' hua'an pochin chiniquën pënëntërainhuë'. Sanoanan quëran pënënainquëma'. Yosë nanamën noya natërama'. Yacatahuarainquëma' noya cancantacamaso marë'.

2 ¹I'hua nicaponquëma' yapantapirahuë', co pa'nahuë'. Pa'nahuë naporini, asëchitënuëmahuë'. ²Chiniquën pënënpatënuëma', sëtarama'. Co nohuantërahuë' asëta'huanquëmaso'. Canpita sëtohuatama', co huachi

nanpimiatapi. ¿Incarita' nanitërin ina pochin noya a'chinacaso'? Co insonta' nanitërinhuë' inaora a'chinacaso', ténahuë. ¹⁷A'naquën nonpinatona', inahuaa canacaiso marë' a'chinapi. “Yosë nanamën a'chintërainquëma',” topirinahuë', co no'tëquën a'chinpihuë'. Quiyaso nipirinhüë' no'tëquën sha'huitërainquëma'. Yosë a'parincoi ni'ton, ina nanansáchin a'chinarai. Yosë ni'sárincoi ni'ton, Quisocristoíchin natëarai.

Nasha quëran anoyatërinso'

3 ¹“Ina pochin nonpatama', naquë-ranchin a'napita nocanarama',” ¿itëramacoi ti? Co insonta' nocanaihuë'. A'naquënso' carta a'napitari ninshitërinso' a'notërainquëma' nohuitacaso marë'. “Iso quëmapiso' noya. A'chintohuachinquëma', noya natanco',” ténin quiricaquë. Inanpi quirica co ma'parainquëmahuë'. Co ina pochin nohuanteraihuë'. Nani noyá nohuitëramacoi. ²Canpitaso' cartanëhuëi pochin ninama', cancanëhuëiquë Quisocristori ninshitërinso'. Nanamën chachin a'chintohuatëinquëmara, noya imarama'. Ya'ipi piyapi'sa' ni'ninëinquëma'. “Paono ca'taninsopitarë chachin a'chintërin ni'ton, noya cancantopi,” ta'tona', noya ni'ninacoi. ³A'chintohuatëinquëmara, noya natanatoma' Quisocristo imarama' ni'ton, noya carta pochin ninama'. Quisocristo chachin ninshitërinso'. Ina cartaso' co napisëquë ninshitërinhuë'. Co na'piquë tëranta' ninshitërinhuë'. Yosëso' nanpimiatarin ni'ton, Ispirito Santo anoyacancantërainquëma' nóya nicacamaso marë'.

⁴Quisocristo catahuarincoi ni'ton, noya a'chintërainquëma'. Ina marë' Yosë noya ni'sarincoi, ténai. ⁵Quiyaora co pi'pisha tëranta' nanitërai huë' noya

a'chinta'huainquëmaso'. Yosëíchin ananitërincoi. Co catahuarincoihuë' naporini, co canpitanta' cancanëma quëran imaitomahuë'. ⁶Ina nani acorincoi a'china'huaiso marë'. Acohua-chincoira, catahuarincoi nasha quëran anoyatërinso a'chinta'huainquëmaso marë'. Ina imapatëhua', Ispirito Santo catahuarinpoa' Yosë nohuitatëhua' nanpimiatacaso marë'. Iráca anoyatërinso Moisésëri ninshitopirinhuë'. Ina imapatëhua, co onporonta' noya cancantërehuahuë'. “Co natëhuatamahuë', chiminpatama', ana'intacaso' ya'huërin,” ténin. Co ina a'chintërainquëmahuë'.

⁷Iráca Yosë pënëntërinso' sha'huihuachina, na'piquë ninshitërin. Yosëso' noya noya ni'ton, huënaráchin ya'norin. Moisésë ya'pirionta' huënaratarin ni'ton, co israiro'sa' nanitopihuë' hua'qui' nirayacaiso'. Huënarataponahuë', oshaquëran sacorayarin. Pënëntërinsona' noya niponahuë', co ya'huëmiatërinhuë'. Co ya'ipi natëhuachinahuë', chiminpachina', ana'intacaso' ya'huërin. ⁸Iporaso nipirinhüë', nasha quëran anoyatërinso a'chinarai. ¿Ispirito Santo chachin catahuarinpoa' ni'ton, inaso' noya noya! ⁹Iráca pënëntërinso' nanan noya nipirinhüë', co natëhuachinahuë', ana'intacaso' ya'huërin. Quisocristo nanamënso nipirinhüë', noya noya. Ina imapatëhua', oshanënpoa' inquitatopoa', Yosë noya ni'sarinpoa'. Napoaton noya noya, ténahuë. ¹⁰Iráca Moisésë noya pënëntopirinhuë', iporaso' noya noya ya'huëtërinpoa'. ¹¹Iráca pënëntërinso sha'huitohuachina, huënaráchin pochin ya'nopirinhüë', sacorin huachi, co ya'huëmiatarinhüë'. Iporaso' nasha quëran anoyatërinso, ya'huëmiatarin. Co onporonta' nishatarinhüë' ni'ton, noya noya, tënëhua'.

12“Inaso co ta'huantarinhüè,” ta'toi, inasáchin a'chinarai. Co të'huatoihuè', ya'ipi parti a'chinarai. 13Íráca Moisésë pënëntohuachina, ya'pirin huénaratorpirinhüè', oshaquèran sacorayarin. Napoaton nipa'copirayatèrin ama sacorayarinsò' quènanacaiso marèhuè'. Quiyaso' co ina pochin a'chintèrainquémahuè'. 14Israiro'saso nipirinhüè' co natantochináchinhüè' cancantopi. Ipora huanta' Yosë quiricanèn iráca ninshitopiso' nontopirinhüè', co no'tèquèn yonquipihuè'. Nipa'copirayatèrinso pochin cancantatona', co nanitopihuè' Yosë quiricanèn no'tèquèn nitotacaiso'. Quisocristoíchin catahuarinpoa' no'tèquèn nitotacaso'. 15Ipora huanta' Moisésë ninshitèrinso' nontopirinhüè', co no'tèquèn yonquipihuè'. 16Quisocristo imapatèhua', co huachi nipa'copirayatèrëso pochin cantarihuahuè'. Sinioro noya nohuitarihua'. 17“Sinioro” topatèhua', Ispirito Santo tapon naporèhua'. Ina catahuahuachinpoa', co huachi iráca pënëntèrinso' imacaso' ya'huèrinhuè'. Ispirito Santo nicha'èrinpoa' no'tèquèn yonquicaso marè'. 18Sinioro imapatèhua', co huachi nipa'copirayatèrëso pochin cantarihuahuè'. Isihuicoquè ma'sha a'notèrëso pochin ninèhua'. Yosë nóya nininsò' piyapi'sa' anitotèrèhua'. Apira apira ina yonquihuatèhua', oshaquèran Yosë pochachin cantarihuaha'. Ina nohuanton, Ispirito Santo catahuarinpoa' noya noya cancantacaso marè'.

4 1Yosë nosoroatoncoi, acorincoi ina nanamèn a'china'huaiso marè'. Ina yonquiatoi, co yaa'poraihuè'. 2A'naquènso' co noyahuè' yonquiatona', a'chinapi. Noyasha nonpirinhüè', nonpinacaiso marè' napopi. Quiyaso nipirinhüè' co manta' po'oana quèran ninaihuè' ni'ton, co tapana'huaiso'

ya'huèrinhuè'. Co nisha nisha a'chinaihuè'. Ya'ipi Yosë nanamèn no'tèquèn a'chintarainquëma'. Yosë ni'sárincoi ni'ton, inasáchin a'chinarai. A'ninquèchin a'chinai ya'ipi piyapi'sa' yonquicaiso marè'. 3Quisocristo nanamèn noya a'chintopiraihuè', a'naquèn co yanatètopihuè'. Parisitopiquè pacaaiso nipisopita co nohuantopihuè' natètacaiso'. 4Sopai nohuanton, co nanitopihuè' no'tèquèn yonquicaiso'. Ma'sha a'pintèrëso pochin nanamèn quèran Yosë anitotèrinpoa' Quisocristo nohuitacaso marè'. Inaso' Yosë chachin ninin. Inapitaso nipirinhüè' somaraya pochin cancantatona', co nanitopihuè' natètacaiso'. 5Co quiya imancoiso marè' a'chintèrainquémahuè'. Quisocristo nanaménáchin sha'huitèrainquëma'. “Sinioro ni'ton, inasáchin yonquicaso' ya'huèrin,” ténai. Quiyanta' ina natètoi, nani tahuèri yacatahuarainquëma'. 6Ya'nan isoro'pa' acoapon ya'ipi parti tashipirinhüè': “Nii'sohuanchin huachi,” ténin Yosë. Napohuachina, tahuèri ya'huèrin. Inapochachin iporasò' cancanènpoaquè a'pintèrinpoa' ina nohuitacaso marè'. Inaso' noya noya. Quisocristo ya'pirin quèran a'pintèrinpoaso pochin ninin. Ina yonquihuatèhua', Yosë chachin anohuitarinpoa huachi.

Yosë natètona', chiníquèn cancantopiso'

7Co quiyaso' chiníquèn nanantopiraihuè', Yosë nohuitatòi, a'napitanta' catahuarai ina nohuitacaiso marè'. Ni'co'. Yonsha, huè'èta, inapita no'pa quèran nipi ni'ton, co ya'huèmiatèrinhuè'. A'naroáchin ya'quihuachina, co noyatèrinhuè'. Napoonin. Inapochachin quiyanta' co chiníquèn cancantopiraihuè', Yosë catahuarincoi nanamèn

a'china'huaiso'. A'napitanta' natanatonacoi, yonquiapi. “Ma noyacha Yosëri catahuarin paya. Co catahuarinhuë' naporini, co ina pochin nanichitonahuë'” tosapi. ⁸Nani ma'sha onpopiraihuë', Yosë catahuarincoi ahuanta'huaiso marë'. “Oshaquëran nicha'ësarincoi,” ta'toi, imarai. “¿Onpoatoicha ma'sha onporai paya?” tapoiraihuë', co pa'yanaihuë'. ⁹A'chinois marë' chiniquën no'huipirinacoihuë', co Yosë naniantërincoihuë'. Aparisitopirinacoihuë', co ata'huantërinacoihuë'. ¹⁰Iráca Quisocriso chiniquën aparisitahuatona', tëpapi. Quiyanta' Quisocriso marë' parisitarai. A'naquën yatëparinacoi. Napoaponahuë' Quisocriso nanpiantarin ni'ton, catahuarincoi ina pochin nica'huaiso marë'. ¹¹Quisocriso nanamën a'chinois marë' yatëparinacoi. Quiyaora co nanitopiraihuë', nani tahuëri ina achinicananincoi ina pochachin yonquica'huaiso marë'. Ipora huanta' nanpitoi, Quisocriso pochin cantarai. ¹²A'chintërainquëmaso marë' aparisitonacoi, yatëpaperinacoihuë', canpitaso' imarama'. Quisocriso anoyacantërinquëma' ni'ton, nanpimiatarama', tënhuë'.

¹³Yosë quiricanënuë ninshitopi. “Yosë natërahuë ni'ton, sha'huirahuë,” tënin. Quiyanta' inapochachin cantantërai. “Yosë catahuarincoi,” ta'toi, nanamën a'chinarai. ¹⁴Tëpaperinacoihuënta', Quisocriso imarai ni'toi, Yosë ananpitaantarincoi, tënai. Iráca Quisocriso ananpitaantarins'o pochin quiyanta' ananpitaantarincoi. Yosë'pa' quëpantarincoi. Canpitaro'coi chachin ya'huëcontarihua huachi. ¹⁵Canpitanta' imacamaso marë' parisitërai. Inaora nohuanton, Yosë na'con nosororincoi. Na'con na'con piyapi'sa' ina nohuito-huachina', noya cantantatona', Yosë

nontapi. “Ma noyanquëncha, Sinioro, paya. Nosoroatoncoi, nicha'ësarancoi ni'ton, ‘Yosparinquën, Sinioro,” itapi.

¹⁶Napoaton co a'pochináchinhuë' cantantërai. Parisitatoi, co huachi chinipiraihuë', nani tahuëri achinicananincoi noya noya cantanta'huaiso marë'. ¹⁷Tëhuënychachin iporas'o pi'pian parisitapirëhuahuë', co hua'qui' isoro'paquë ya'huarihuahuë'. Yosë'pa' pa'patëhua', co onporonta' pipiarëhuahuë'. Imarëhuaso marë' parisitapirëhuahuë', inapaquëso' noya noya cantantarihua'. Yosë pochachin cantantarihua'. ¹⁸Isoro'paquë ya'huë'rinsopita co na'con na'con yonquirëhuahuë'. Iporaso' parisitarihuahuë', co ina marë' sëtarihuaahuë'. Yosë na'con na'con yonquiarëhua'. Ina nohuitacasoáchin cantantarihua'. Isoro'paquë ya'huë'rinsopita quënanpirëhuahuë', co ya'huëmiatarinhuë'. Ta'huantarin. Yosë noya yonquirinpoasoso' co quënanpirëhuahuë', ya'huëmiatarin.

5 ¹Ni'co'. Pëi' në'mëtë quëran nipachinara, co hua'quirinhuë'. Inapochachin nonënpoanta' co ya'huëmiatarinhuë'. Chiminpatëhua', Yosë'pa' pa'patëhua', nasha nonënpoa' Yosë quëtarinpoa'. Noya noya ninins'o quëtarinpoa'. Inaso' co onporonta' chanatarinhuë'. ²Iporaso' parisitapirëhuahuë', a'na tahuëri nasha a'morëhuaso pochin nasha nonënpoa' ya'huëtarinpoa'. Ina na'con nohuantërehua'. ³Chiminpatëhua', co hua'yanënpoarachin inápaquë ya'huëmiatarinhuë'. Nasha nonënpoa' quëtarinpoa'. ⁴Iporaso' isoro'paquë ya'huatëhua', co chinirëhuahuë', sëtërehua', naporëhua'. Napopirëhuahuë', co chiminacaso' nohuantërehuaahuë'. Nasha nonënpoa' tëhuënychins'o na'con nohuantërehua'. Isoro'paquë ta'huantopirëhuahuë', Yosë'pa' noya

noya nanpimiatarihua'. ⁵Yosë acorinpoa' nasha nonënpoa' ya'huëtinpoaso marë'. Tëhuënhachin inápaquë noya ananpitaantarinpoa', tënëhua'. Sichoquë marca acorëso pochin nani Ispirito Santo aya'coancantërinpoa' ni'ton, nitotërehua'.

⁶Napoaton chiníquën cancantërehua'. "A'na tahuëri Yosë'pa' pa'sarëhua'," ta'tëhua', noya cancantarëhua'. Tëhuënhachin isoro'paquë nanpihuatëhua', co Quisocriso nirayarihuahuë'. ⁷Co ipora quënanpirëhuahuë', "Yosë no'tëquën nontërinpoa'," ta'tëhua', natërehua'. "Co onporonta' nonpintarinpoahuë'," tënëhua'. ⁸Napoaton chiníquën cancantërehua'. "Chiminpatëhua', Quisocris torë'quënpoa' ya'huëcontarihua'. Inaso' noya noya," tënëhua'. ⁹Ma'sona tëranta' nipatëhua', Yosëíchin natërehua' noya nicainpoaso marë'. Nanpihuatëhua', chiminpatëhuanta', Sinioro nohuan tërinsóachin nohuan tërëhua'. ¹⁰A'na tahuëri Quisocriso o'mantahuachin, ya'lipinpoa' coisë pochin sha'huitarinpoa'. Ya'ipi ninëhuasopita yonquiaton, a'naya a'nayanpoa' no'tëquën nontarinpoa'. Co noya nipatëhuahuë', co Yosë'pa' acanaarinpoahuë'. Noya nipatëhua', acanaarinpoa huachi.

Nanan anoyatërinpoaso'

¹¹Napoaton Yosë t'ëhuatacaso' ya'huërin. Ina yonquiatoi, ya'ipi piyapi'sa' pënënarai. Co pi'pian tëranta' nonpintërainquëmahuë'. Yosë ni'sárincoi ni'toi, no'tëquën nontërainquëma'. Noya ninaiso' canpitanta' nitotërama', topiraihuë'. ¹²"Quiyaso' noya noyacoí," co tënaihuë'. Co a'napita nocanaihuë'. Nisha nanan a'china'piro'sa' noya pochin ya'noponaraihuë', co cancanëna quëran huarë' imapihuë'. Pinopachincoí, sha'huitoco': "Paono

tëhuënhachin no'tëquën nontërincoi. Ya'ipi cancanën quëran huarë' Quisocriso imarin," itoco'. Ina pochin a'panicamaso marë' sha'huitaranquëma'. ¹³A'naquën na'con pënënpatëira, "Hua'yantopi," itërinacoí. Napopirinahuë', Yosë yonquiatoi, naporai. A'na tahuërinta' sanoanan quëran pënënainquëma'. Yosë yonquicamaso marë' ina pochin nontërainquëma'. ¹⁴"Quisocriso na'con nosororinpoa'," ta'toi, nanamën a'chinárai. Canpoa marë' inaso' chiminin. Ina imapatëhua', canpoanta' chiminëhuaso pochin ni'ninpoa'. ¹⁵Tëhuënhachin canpoa marë' chiminin noya noya cancantacaso marë'. Co huachi canpoara costarëhuaso' pa'yatacaso' ya'huërinhuë'. Inasáchin yonquicaso marë' chiminin. Chiminaponahuë', nanpiantarin ni'ton, inasáchin yonquirëhua'. ¹⁶Íráca quiyaora yonquinëhuëi quëran yonquiatoi, aipi ya'norinsoráchin yonquirai. Quisocrisonta' íráca co no'tëquën yonquirapiraihuë'. "Co inaso' Yosë hui'ninhuë'," topiraihuë', iporasó' no'tëquën yonquirai. ¹⁷Quisocriso imapatëhua', Yosë anoyacancantarinpoa'. Nasha cancan ya'huëtarinpoa huachi. Íráca yonquirëhuasopita naniantërehua'. Nashamiachin pochin cancantatëhua', noya noya yonquiarihua huachi.

¹⁸Co canpoara noya cancantërehua-huë'. Yosëíchin anoyacancantërinpoa'. Íráca oshahuanatëhua', Yosë inimitopirëhuahuë', inaora nohuan ton, hui'nin isoro'paquë a'paimarin chiminatón nanan anoyatinpoaso marë'. Ina quëran quiyanta' acorincoí nanamën a'china'huaiso marë'. Insosona natëhuachin, nanan anoyatarin. ¹⁹Yosë nohuan ton, hui'nin chiminin anoyacancantínpoaso marë'. Anoyacancantóhuachinpoa', co huachi oshanënpoa'

yonquirinhuë', inquitërinpoa huachi. Nani nanan anoyatohuachinpoara, quiyanta' acorincoi paatoi a'napita sha'huita'huaiso marë'. ²⁰Quisocristo chachin acorincoi a'napita anitota'huaiso marë'. Ina ya'huërënamën pochin sha'huitarainquëma'. “Yosë nontoco' nanan anoyachinquëma',” itárainquëma'. ²¹Íráca Quisocristo co manta' oshahuanaponahuë', Yosë nohuanton, ya'huërëtërinpoa'. Oshahuan pochin nicon, Yosëri chiníquën ana'interin. Canpoa marë' chiminin ni'ton, co huachi oshahuan pochin ni'ninpoahuë'. Quisocristo imapatëhua', Yosë nóya ni'sarinpoa'.

6 ¹Yosë acorincoi nanamën a'china'huaiso marë'. Acoatoncoi, catahuarincoi a'chinta'huainquëmaso marë'. “Yosë nosoroatonpoa', yanicha'ërinpoa',” itërainquëma'. Ama topinan quëran natancosohuë'. Imaco huachi. ²Íráca quiricanën quëran Yosë naporin:

“Ipora chachin yacatahuanquëma'. Nontohuatamaco, natanaranquëma'.

Yanicha'ëranquëma' ni'ton, catahuanquëma' cha'ëcamaso marë',” ténin.

Ipora tahuëri chachin yacatahuarinpoa'. Nontohuatëhua', anoyacancantarinpoa', tënhuë'.

³Napoaton noyasáchin ninai ama a'na piyapi tëranta' nisha cancantacaso marëhuë'. Co noyahuë' ninai naporini, a'napitanta' niconaco, co Yosë imaitonahuë'. ⁴Ma'sona tëranta' nipatoira, Yosëichin natërai piyapi'sa' niconaco ina yonquicaiso marë'. Aparisitopirinacoihuë', co i'huërëtërainhuë'. Ma'sha, cosharo', inapita pahuantopirinacoihuë', ahuantatoi, chiníquën cancantërai. Ma'sha onpoapoiraihuë', co pa'yanaihuë'. ⁵A'chinoiso marë' tëhuëenchachin

huihuirinaco, tashinan pëiqué po'morinaco. Chiníquën no'huitatona', ahüërinaco. A'chinapoi pa'sápatoi, co huachi chiniraihuë'. Na'a tashi' Yosë marë' sacatápatoi, huë'ëi' natanai. A'na tahuërinta' co coshatatoihuë', tana natanai. ⁶“Quisocristo imarai,” ta'toi, noyasáchin ninai. Yosë nanamën noya nitotërai. Ma'sha onpotopirinacoihuë', co no'huiraihuë', ahuantërai. Ya'ipi piyapi'sa' nóya nontatoi, catahuarai. Ispirito Santo ya'coancantërincoi ni'ton, catahuarincoi noya nica'huaiso'. Tëhuëenchachin cancanëhuëi quëran huarë' piyapi'sa' nosororai. ⁷No'tëquën a'chinai. Yosë na'con catahuarincoi ni'ton, a'chinpatoira, na'a piyapi'sa' natanatona', imasapi. Ni'co'. Inimicoro'sa' huë'pachinara, sontaro'sa' hua'na quëran a'morin ama inimicori paquitacaso marëhuë'. Inapochachin Yosë achinirincoi ama sopai minsëincoiso marëhuë'. Yosë nohuanton, noyasáchin ninai. Noya catahuarincoi ni'ton, sopai minsëarai. ⁸A'naquën noya ni'ninaco. A'naquënso nipirinhuë' no'huirinaco. A'na tahuëri: “Paono nóya a'chinin,” topi. A'na tahuëriso nipirinhuë' pinorinaco. No'tëquën a'chintopiraihuë': “Nonpiánpi,” topi a'naquënta'. ⁹Na'a piyapi'sa' nohuitopirinacoihuë', a'naquënso' nisha pochin niconaco, co yanataninacoihuë'. Pi'pianchin shichiminpiraihuë', nanpiárai. Chiníquën aparisitopirinacoihuë', co tëparinacoihuë'. ¹⁰Sëtopiraihuë', Yosë yonquiatoi, noya cancantërai. Co na'con ma'sha ya'huëtopyirinacoihuë', Yosë nanamën a'chintërai ni'ton, na'a piyapi'sa' natëtonaco, noya noya cancantapi. Co manta' ya'huëtopyirinacoihuë', Yosë nohuitatoi, sano cancantërai. Co manta' noya nininso' pahuantërincoihuë'.

¹¹Corintoquë ya'huëramasopita, na'con ninshitarainquëma'. Nani ya'ipi yonquiraiso', iyaro'sa, sha'huitërainquëma'. Na'con nosororainquëma'.
¹²Quiyaso' ya'ipi cancanëhuëi quëran nosoromiatërainquëma'. Noyasáchin yonquipirainquëmahuë', canpitaso' co a'na nosororamacoihuë' nimara, tënai.
¹³Hui'nahuëpita pochin ni'nanquëma' ni'ton, inapochachin nosorocoi quiyanta', topiraihuë'. Ina na'con nohuantërai.

Nipayarëhuasopita

¹⁴Co Yosë imapisopitasohuë' nipirinhuë', ama inapitarë'quëma' na'con na'con nipayacosohuë'. Co canpita pochin cancantopihuë'. Noya cancantohuatama', co nohuantaramahuë' oshahuanacamaso'. Ni'co'. Tahuëri, tashi' co inachachinhuë'. Nisha nisha ya'nopi.
¹⁵Quisocristo sopairë' co napopináchin yonquipihuë'. Naporahuaton, canpoaso' Quisocristo imarëhua' ni'ton, co oshahuano'sa pochin cancantërehuahuë'.
¹⁶Yosë chinotërehuahuë' noyasáchin nicacaso' ya'huërin. Co inaquëso' mamanshi moshacaso' ya'huërinhuë'. Inapochachin canpoanta' Yosë imapatëhua', ya'coancantarinpoa' ni'ton, ina pëinën pochin ninëhua'. Yosëso' nanpiárin. Quiricanën quëran naporin:
 "Imapatamaco, ya'coancantarinquëma'. Canpitaro'co ya'huarahuë'.
 Chinotohuatamaco, noya a'paianranquëma'.
 Piyapinëhuëpita pochin ni'saranquëma'," tënin.
¹⁷Ina quëran Siniorori itantarín:
 "A'naquën co noyahuë' cancantohuachina', ama inapitarë'quëma' nipayacosohuë'.
 Co noyahuë' yonquipiso' tananpitoco'.

Inapotohuatama', noya ni'saranquëma'.

¹⁸Tataparinquëma pochachin noya nosoroaranquëma'.
 Hui'nahuëpita pochin cancantëranquëma',
 itërinpoa' Tata Yosë. Chini chiniquéen nanantaton, ya'ipiya hua'anëntërin," tënin quiricanënguë'.

7 ¹Iyaro'sa na'con nosororainquëma'. Ina pochin Yosë yonquirinpoa ni'ton, ya'ipi co noyahuë' yonquirëhuasopita naniantahua'. Ya'ipi co noyahuë' ninëhuasopitanta' a'poa'ahua'. Yosë tè'huatatëhua', noyasáchin niahua'.

Noya cancantantapiso'

²Cancanëma quëran huarë' nosorocoi. Co a'nayanquëma tëranta' ma'sha onpotërainquëmahuë'. Co anishacancantërainquëmahuë'. Co nonpintërainquëmahuë'.
³Co nocantëinquëma' pënënanquëmahuë'. Na'con nosororainquëmaso' nani sha'huitërainquëma'. Chimina'huaiquë huarë' nosoromiatarainquëma'.
⁴Tëhuënchachin nóya ni'nanquëma'. "Corintoquë ya'huëpisopita noya imapi," itërahuë ya'ipi piyapi'sa'. Parisitaporahuë', canpita yonquiatëinquëma', nóya cancantërahuë'.

⁵Masitoniquë canconpatoira, na'con ma'sha onpoatoi napion cancantërai. Na'a piyapi'sa' no'huirínacoi ni'ton, parisitërai. Naporahuaton, cancanëhuëi quëran na'con yonquirápatëinquëma', sëtërai.
⁶Sëtohuatëhua', Yosë achinicancaninpoa' ni'ton, quiyanta' achinicancanincoi. Ina nohuanton, Tito huë'nin.
⁷Napoaton noya cancantërai. Noya nanan sha'huitiiríncoi. Noya yonquiantarama' ni'ton, inanta' noya cancantërin. I'hua ni'conpachinquëmara,

napotërama! "Hua'qui' co Paono ni'nin-coihuë'. Sha'huitëquë' manóton huë'in. Co noyahuë' ninaiso marë' sëtërai. Paono pënënpachincoi, noya natanai," tënama!, itërincoi. Ina natanato, nóya cancantërahuë'.

⁸⁻⁹I'hua quirica ninshitatënguëma!, chiníquën pënënanquëma!. Ina quirica nontohuatamara, pa'pi sëtërama!. Ina natanato, canta' sëtöpirahuë!. Co nohuantërahuë' chiníquën asëta'huanquëmaso!. Iporaso nipirinhüë' noya cancantërahuë. Co hua'qui' sëtëramahuë!. Oshanëma marë' sëtätoma!, na'con na'con Yosë yonquirama!. Co noyahuë' ninamasopita a'porama!. Pënënanquëma! ni'ton, co ana'intinquëmaso' ya'huërinhuë'. ¹⁰Oshanënpoa marë' sëtätëhua!, Yosë nontohuatëhua!, catahuarinpoa' co noyahuë' yonquirëhuasopita naniantacaso marë!. Ina pochin sëtacaso' noya, tënahüë. Ina quëran anoyacancantarinpoa!. Co imapisopitasohüë' nipirinhüë' topinan quëran sëtöpi. Co oshanëna' naniantohuachinahuë!, chiminpachina!, Yosëri ana'intarin. ¹¹Canpitaso' sëtätoma!, na'con na'con Yosë yonquirama!. Ina quëran "Tëhuënhachin co noyahuë' nicatëhua!, oshahuanëhua!. Co noyahuë' ninëhuasopita naniantahua!, Yosë ana'into huachinpoa!," tënama!. Canta' noya yonquiramacö. "Manóton Paono huë'in catahuainpoaso marë!. Chiníquën cancantatëhua!, no'tëquën natëahua!," tënama!. Oshahuana'pi co noyahuë' nininso marë' ana'intërama! noya nicacaso marë!. Ya'ipi co noyahuë' yonquiramasopita naniantatoma!, noya cancantaantarama!. ¹²I'hua ninshita-ponquëma!, co tëhuëna'pi yonquiato, ninshitëranquëmahüë!. Co inari aparisitërinso tëranta' yonquirahuë!. Ya'ipinquëma' noya yonquiantamacöiso'

nohuantërahuë. "Paonosö catahuarin-sopitarë chachin, no'tëquën pënëninpoa!. Yosë ni'sarinpoa' ni'quëhuarë!, natëahua!," ta'camaso marë' ninshitëranquëma!. ¹³Naporama' ni'ton, co huachi sëtëraihuë'.

Tito cantonpachinquëmara, co pi'pian tëranta' no'huiramahuë!. Noya nontërama' ni'ton, noya cancantërin. Quiyanta' ina natanatoi, nóya cancantërai. ¹⁴Co'huara Tito pa'shätërasohüë!, sha'huitërahuë: "Corintoquë ya'huë-pisopita noya imatona!, natëarinënguën," itërahuë. Canpita no'tëquën nontërainquëmaso pochachin Titonta' no'tëquën nontërahuë. Pa'pachina, tëhuënhachin noya natërama' ni'ton, co tapanahuë!. ¹⁵Pënënpachinquëmara, itërama!: "No'tëquën pënënancoi. Tëhuënhachin co noyahuë' ninai. Yosë të'huata'huaiso' ya'huërin," ta'toma!, natërama!. Ina natanahuaton, Titonta' na'con nosororinquëma!. ¹⁶Carinquëmanta' yonquiatënguëma!, nóya cancantërahuë. Noya noya imasarama huachi, tënahüë.

Pahuantërinso-pita catahuacaso' ya'huërinso'

8 ¹Isonta' iyaro'sa' yasha'huitëranquëma!. Masitonia parti na'a piyapi'sa' Quisocristo imasapi. Nisha nisha ninanoquë niyontonatona!, Yosë chinotapi. "Yosë na'con nosororinpoa!," ta'tona!, a'napita noya nosoroapi. Yosëri chachin catahuarin ina pochin cancanta-caiso marë!. ²Ma'sha onpotohuachinara, chiníquën parisitaponaraihuë!, noya cancantöpi. Naporahuaton, pi'pisha ya'huëtöpirinahuë!, a'napita imapisopita pahuantohuachinara, na'con coriquiquëtöpi. ³Co apiratonahuë!, na'con quëtöpi. Pahuantaiquëhuarë' quëtöpi, cari ni'nahuë. Co sha'huitöpiraihuë!,

inahuara nohuantatona', quëtëri-nacoi pahuantërin SOPITA quëtaca-huaise marë'. ⁴“Quiyarinta' a'napita imapisopita catahua'li, topiraihuë'. Cotia parti na'con pahuantopi ni'ton, iso coriqui quëtonquë',” itërinacoi. Na'con ina pochin nontërinacoi. ⁵Co coriqui quëtacasoachin yonquipihuë'. Ya'ipi cancanëna quëran Yosë imapi. Ina'ton yonquipi. Ina pochin cancantacaso' noya noya, tënahüë. Ina quëran coriqui, ma'sha, inapita quëtopi. Quiyanta' yanatërinacoi. “Ma'sona Yosë nohuantohuachin, sha'huitocoi natë'i,” itërinacoi. ⁶I'hua chachin Tito sha'huitërinquëma' ni'ton, canpitanta' yonquirama' coriqui yontonacamaso'. “Imapisopita pahuantopi ni'ton, a'patahua',” tënama'. Napoaton i'huamiachin Tito itërai: “Naquëranchin paantaton, pënëantaquë' ya'ipi coriqui yaa'papiso' ananiina',” itërai. ⁷Canpitaso' nóya imarama' ni'ton, Quisocristo natërama'. Na'con nitotatoma', a'chinama'. A'napita yacatahuarama'. A'chintëranquëmaso pochachin a'napita nosoroarama'. Napoaton iporaso' pahuantopisopita nosoroatoma', catahuaco', tënahüë.

⁸Co camairanquëmahüë'. A'napita na'con Yosë marë' acopiso' sha'huitëranquëma' yonquicamaso marë'. Tëhuëenchachin a'napita nosorohuatama', ama topinan quëran nontocosoahuë'. Catahuaco' ama pahuanchinasoahuë'. ⁹Siniro Quisocristo nosoroatonpoa', catahuarinpoaso' nani nitotërama'. Iráca noya noya inápaquë ya'huëpirinhuë', isoro'paquë o'marin nicha'ëinquëmaso marë'. Co manta' isëquë ya'huëtërinhuë'. Parisitërin quëran nicha'ërinquëma' noya noya cancantacaso marë'. Parisitaton, na'con catahuarinquëma'.

¹⁰I'hua pi'iquë yonquirama' a'napita catahuacamaso'. Naporo' caniaritërama'

coriqui yontonacaso'. Iporaso' naquëranchin yontoantaco', tënahüë. Inapohuatama', noya nisarama'. ¹¹Naporo' pa'pi nohuantopiramahuë', iporaso' coriqui ya'huëtohuachinquëma', noya cancantatoma', yontonco' ananicaso marë'. ¹²Ya'ipi cancanëma quëran quëtohuatama', Yosë noya ni'sarinquëma'. Co na'a coriquihuanpatamahüë', Yosë nitotërin. Co nanitëramahuë' na'a quëtacaso'. Co apiratomahuë', pi'pian tëranta' quëtohuatama', noya ni'sarinquëma'.

¹³Nanitinpichin acocaso' ya'huërin. Co nohuantërahuë' pahuantinquëmaso'. ¹⁴Noya nicatahuacaso' nohuantahua'. Iporaso' ya'huëtëranquëma' ni'ton, pahuantërin SOPITA quëtoco'. A'na tahuëriso' canpita ya'huë'rë' ma'sha pahuantohuachinquëma', inahuanta' i'huëretarinëinquëma'. Ninapotohuatëhua', ya'ipi imarëhuasopita noya ya'huarigua'. Co pahuantarinpoahuë'. ¹⁵Iráca Yosë quiricanëinquë naporin: “Mana mapachinara, a'naquënso' na'a maponaraihuë', co ya'sotopihuë'. A'naquënso' nimirinhuë' pi'pian maponaraihuë', co pahuantopihuë',” tënin.

Tito Corintoquë a'parinso'

¹⁶Titonta' na'con yonquirinquëma'. Ina marë' noya cancantato, “Yosparinquë, Siniro,” itërahuë'. ¹⁷“Naquëranchin paantaquë',” itohuatëra, “Noyahua'. Nani canta' yonquirahuë' paanta'huaso'. Na'con nohuantërahuë',” itërinco.

¹⁸A'na iyayanta' a'paarai. Titorë' pa'sarin. “Inanta' nóya imaton, Quisocristo nanamën noya a'chinin,” topi ya'ipi imapisopita. ¹⁹Nisha nisha ninano quëran imapisopita niyontonahuatona', ina quëmapi chachin huayonahuatona', acopi ca'tanaincoiso marë'. Coriqui yoca'huaise marë' pa'pato'i, inanta'

pa'sarin. Coriqui quëtonpatoï, noya cancantapona huachi. “Ma noyacha Tata Yosë nosororinpoa paya. Ina nohuanton, iyaro'sa' noya cancantatona', catahuarinënpoa',” taponal.²⁰ Na'a coriqui quëparai ni'ton, co nohuantëraihuë' a'napita pinoinacoiso'. Napoaton ina napocoi pa'sarai. ²¹Noyasáchin nisarai Yosë noya nicaincoiso marë'. Piyapi'santa' noya nicainacoiso' nohuantërai.

²²A'na iyayanta' a'parai nicainquëmaso marë'. Inanta' na'con catahuarincoi a'china'huaiso marë'. Piyapi'sa' nosoroaton, catahuarin, a'chintërin, naporin. Noya quëmapi, tënai. Ipora canpitataquë pa'sarin. “Corintoquë imapisopita na'con nohuantopi pahuantërinso'pita catahuacaiso',” ta'ton, pa'sarin catahuainquëmaso marë'.

²³“¿Inta' Titoso'?” itohuachinënquëma', sha'huitoco'. “Co'ta Paonorë' a'chininso'. Inanta' piyapi'sa' catahuarin noya imacaiso marë',” itoco'. “¿Ma'marëta' a'napitanta' huë'pi?” itohuachinënquëma', “Nisha nisha ninano quëran a'paipiso'. Quisocristo noya imapi inapitanta',” itoco'. ²⁴Inapita cantonpachinquëma', noya nontoco'. Ina quëran coriqui pahuantërinso'pita marë' yontonamaso' quëtohuatama', noya ni'sarinënquëma'. “Paono no'tëquën nontërinpoa'. Corintoquë imapisopitaso' pahuantopisopita nosoropi mini,” tosapi. Ina quëran ya'huëpique chachin paantahuachina', sha'huirapi anta'. Ya'ipi imapisopita nitotapi huachi.

Imapisopita catahuacaso marë' coriqui yontonpiso'

9 ¹Tëhuëchachin a'napita imapisopita pahuantohuachina', ma'sha quëtacaso' ya'huërin. Nani nitotërama' ni'ton, co na'con ninshitaranquëmahüë'.

²Piyapi'sa' yacatahuaramaso' nitotërahuë. Ya'ipi Masitonia parti pa'pato, sha'huitëra'piarahuë. “I'hua pi'iquë chachin Acaya parti imapisopita na'con yonquipi pahuantërinso'pita catahuacaiso',” itërahuë. Masitonia-ro'sa' natantahuatona', inahuanta' nohuantopi. “Inapita pochin quiyanta' catahuachi, topiraihuë',” itërinaco na'aya'pi. ³Nipirihuë', “Co ya'ipi coriqui yontonchátërapihuë',” ta'to, isopita iyaro'sa' a'pataranquëma' nontinquëmaso marë'. “Nani yontonapi huëshirahuë',” itopirahuë', ipora huanta' pahuana-mara. Co topinan quëran napota'huaso' ya'huërinhuë', tënahüë. ⁴Co hua'quiya quëranhuë' canpitataquë pa'sarahuë. A'naquën Masitoniaquë ya'huëpisopita imasarinaco nimara. Canpitataquë canconpatoï, nani coriqui yonton-topinan quënanconarai, topirahuë'. Co ya'huëhuachinhuë', tapanarahuë. “Corintoquë imapisopitaso' noyaro'sa',” itërahuëso marë', co coriqui ya'huëhuachinhuë', tapanarama' canpitanta'. ⁵Napoaton iyaro'sa' aquëchitërahuë. I'hua yonquirama' a'napita catahuacaso'. Inapitaso' catahuarinënquëma' coriqui yontonacamaso marë'. Nani yontonpatama', noya quënanconarai. Canpitaora nohuanton, quëtoco'. Co quiyaora nohuanton, yama'parainquëmahüë'.

⁶Isonta' yonquico': “Pi'pian sha'tohuatëra, pi'pian manë'. Pancana sha'tohuatëra, na'con manë',” topi. ⁷Ya'ipinpoa' canpoara nohuanton, quëtahua'. Onposona yaquëtohuachin, quëchin. Ama nisha nisha yonquia'huasohüë'. Co apiquëran quëtacaso' ya'huërinhuë'. Noya cancantatëhua', quëtahua'. Ina pochin quëtohuatëhua', Yosë noya ni'sarinpoa'. ⁸Yosë ya'ipi nanitaparain. Nosoroatënquëma', na'con

catahuarinquëma' noya nicacamaso'. Nani tahuëri catahuarinquëma'. Ina catahuahuachinquëma', noya cancantarama'. Ina nohuanton, ya'huëtarinquëma' a'napitanta' quëtacaso marë'.

⁹Iráca Yosë quiricanënguë naporin:

“Noya cancantopisopita co apirapihuë'. Sa'ahuario'sa' pahuantohuachina', quëtapi. Noya nipiso', ya'huëmiatarin,” ténin.

¹⁰Ni'co'. Yosë nohuanton, ya'pirin ya'huërin shacacaso marë'. Sha'patëra, ina nohuanton, na'a papotërin capacaso marë'. Inapochachin ina nohuanton, ma'sha ya'huëtarinquëma'. A'napita topinan quëtohuatama', Yosë catahuarinquëma' noya noya cancantacamaso marë'. ¹¹Noya catahuahuachinquëma', a'napitanta' catahuarama'. Co apiratatomahuë', quëtarama'. Pahuantërinopita quëtônpatoi, “Yosparinquën, Sinioro,” tosapi. ¹²Imapisopita catahuahuatama', co huachi pahuantapihuë'. Naporahuatón, na'con na'con Yosë yonquiapi. “Yosparinquën, Sinioro,” itapi. ¹³Catahuarama' ni'ton, noya cancantapi. “Ma noya Quisocriso nanamën natëtona', catahuarinënpoa'. Ma noyacha Yosëso' ni'ton, ina nohuanton, na'a piyapi'sa' catahuapi paya,” tosapi. ¹⁴Yosë nohuanton, na'con nosororama' ni'ton, inapitanta' nosoroatënguëma', canpita marë' Yosë nontapi huachi. ¹⁵Yosëso nipirinhüë' na'con na'con quëtërinpoa'. Hui'nin chachin a'paimarin nicha'ëinpoaso marë'. Inaso' noya nóya ni'ton, “Yosparinquën, Sinioro,” itahua'.

Yosëri nanan quëtërinso'

10 ¹Ca Paonoco sanoanan quëran pënënanquëma'. A'naquën napopi: “Paono aquë quëran ninshitohuachinpoara, chiníquën nanan

a'patirinpooa'. Isëquë chachin ya'huapon, tē'huatatonpooa', co chiníquën pënëninpoahuë',” topi natantërahuë. Quisocriso' chiníquën nanantaponahuë', co no'huirinpooahuë'. Sanoanan quëran pënëninpoa'. Ina pochin cancantato, canta' sanoanan quëran pënënanquëma'. ²A'naquënso' pinorinaco. “Paonosos' co Yosë pochin yonquirinhüë'. Inaora nohuantërinsoáchin yonquirin,” topirinhüë'. Pa'pato, inapita chiníquën pënënarahuë. Canpitaso nipirinhüë', noya yonquihuatama', co chiníquën pënëna'huanquëmaso' ya'huaponhuë', tēnahuë. ³Piyapicoi quiyanta' nipirinhüë', co a'napita pochin yonquiraihüë'. Co natëpisopitahuëso' inimicotopirinacoihuë', co quiyaora yonquinëhuëi quëran yaminsëraihuë'. ⁴A'naquënso' inimiconënpita minsëcaiso marë' nisha nisha quihuipi. Quiyaso nipirinhüë' co quiyaora yonquinëhuëi quëran minsëtaraihüë'. Sacai' nipirinhüë', Yosë ananitërincoi nonpin nanano'sa' minsëca'huaiso'. ⁵A'naquën nisha nanan imasapi. “Quiyaora noya nitotërai,” toconpi ni'ton, co nanitopihuë' Yosë nohuitacaiso'. Nipirinhüë', Yosë catahuarincoi inapitanta' minsëca'huaiso'. No'huipirinacoihuë', no'tën nanan a'chintarai Quisocrisoíchin natëcaiso marë'. Ya'lipinpoa' co noyahuë' yonquipirëhuahuë', Yosë nanitërin anianintinpoaso' Quisocrisoíchin natëcaiso marë'. ⁶Canpita noya natëhuatama', noya cancantarai. Ina quëran canconpatoi, co natëpisopitahuë' no'tëquën ana'intarai.

⁷Canpitaso' ya'pirama quëran quënanamasoráchin yonquirama'. Co cancanëma quëran huarë' yonquiramahuë'. A'naquën “Quisocriso chachin imarai,” topachinara, isonta' yonqui'ina'. Quiyanta' Quisocriso imarai mini.

⁸Yosë chachin chiníquën nanan quëtë-rincoi nanamën a'chinta'huainquëmaso marë', itohuatënguëmara, co ina marë' tapanahuë'. Noya noya imacamaso marë' a'chintërainquëma'. Co nisha cancantamaso marë' a'chintërainquë-mahuë'. ⁹Chiníquën nanantopirahuë', co apa'yana'huainquëmaso marë' ninshitaranquëmahuë'. ¹⁰A'naquën itërinënguëma': "Paono na'con ninshita-tonpoa', chiníquën pënënpiripoahuë'. Huë'pachinaso', co chiníquën nanantona'pi pochin nontërinpoahuë'. Sanoanayan quëran a'chintërinpoa' ni'ton, co chiníquën nanantërinhuë'," toconpi. ¹¹Napopirinhahuë', co nisha nisha nontaraihuë'. Inapitanta' sha'huitoco' nitochina'. Ninshitohuatënguë-mara, chiníquën pënënanquëma mini. Canpitataquë canconpatoi, inachachin nontarainquëma'. Insosona co yanatëhuachinhue', chiníquën pënënatoi, ana'intarai huachi.

¹²Inapitaso' co no'tëquën yonquipi-huë'. "Quiyaso' noya noyaco. A'napita quëran noya noya nitotërai," toconpi. Co ina pochin nonacasohue' nipirinhue', napopi. Inahua capini ninocanatoná, ninapotopi. Co quiyaso' inapita pochin cancantërainhuë'. ¹³Co quiyaora nohuanton, chiníquën nanantërainhuë'. Yosë chachin acorincoi na'a piyapi'sa' a'chinta'huaiso marë'. Insëquësona a'china'huaisonta' sha'huitërincoi. Ina nohuanton, Corintoquë ya'huëramasopitanta' a'chintërainquëma'. ¹⁴Yosë sha'huitërincoisoráchin natërai. Ina nohuanton, canpitataquë pa'nai. Quiyarima'ton Quisocristo nanamën a'chintërainquëma'. ¹⁵Co a'na piyapi a'chinquë paatoí, a'chinaihuë'. Yosë a'parincoi noya a'chinta'huainquëmaso marë'. Na'con nohuantërai noya noya imacamaso'. Noya noya

natëhuatama', aquëtë huarë' a'chintarainquëma'. ¹⁶Ina quëran a'napita ya'huërinquënta' yaa'chinai. Inapitanta' Yosë imacaiso marë' a'chintarai. A'na piyapi a'chinquë co nohuantërainhuë' a'china'huaiso'.

¹⁷Yosë quiricanënguë naporin: " 'Noya noya ninahuë,' co ta'caso' ya'huërinhuë'. 'Ma noyacha Yosë catahuarinco paya,' ta'caso' ya'huërin," tënin. ¹⁸"Caso' noyaco," topatëhua', co ina marë' Yosë noya ni'sarinpoahuë'. Noya cancantohuatëhua', Yosë noya ni'sarinpoa'. Ina na'con na'con yonquia'ahuá'.

Nisha a'china'piro'sa' yanonpinpiso'

11 ¹Noya nipatëhua', co ina marë' a'napita nocanacasos' ya'huërinhuë'. Nipirinhue', pi'pian hua'yantërinso pochin nonchinquëma' natanco. No'tëquën yonquicamaso marë' sha'huitaranquëma'. ²Yosë nohuanton, na'con nosororanquëma'. Nosoroatënguëma', a'pitëranquëma'. Co nohuantërahuë' nisha cancantacamaso'. Nanon so'yarinso pochin ninin. Ni'co'. Quëmapiri mapachina, so'ináchin yonquicaso' ya'huërin. Inapochachin carinquëmanta' a'chintëranquëma' Quisocristoíchin yonquicamaso marë'. ³A'naquënso nipirinhue' yaanishacancantërinënguëma'. Iráca ya'huani Ipa nonpintërinso pochin yanonpintërinënguëma' ama Quisocristoíchin yonquicamaso marëhuë'. ⁴Quisocristo imacaso' a'chintëranquëma'. Natëhuatama', Ispirito Santo ya'coancantërinquëma'. Inapitaso nipirinhue' nisha a'chintërinënguëma'. "Quisocristo nanamën chachin a'chintarainquëma'," itopirinhënguëmahuë', nisha nanan a'chintërinënguëma'. Nisha ispiritonta' ya'huërin, itërinënguëma'. Nisha nisha

natëcaso' a'chintohuachinquëmara, a'naroáchin yaimarama'. ⁵“Quiyaso' noya noyacoí,” itopirinënguëmahué', inapitaso' co ca quëran noya noyahué', tënahué'. ⁶Co míso nona'picohué' nipo-
rahué', noya noya nitotërahué'. Ya'ipi no'tëquën a'chintëranquëmaso' nani nitotërama'. Nani ma'sha ninahué'-
sonta' nani ni'nama'.

⁷Yosë nanamën a'chintohuatën-
quëmara, co pi'pisha tëranta' coriqui ma'paranquëmahué'. Sacatato, ma'sha pahuantërinco-
so' pa'anahué'. Topinan a'chintëranquëma' canpita noya noya imacamaso maré'. ¿Ina maré' co noya-
hué' ni'namaco tí? ⁸A'chintëranquëmaso maré' co manta' ma'paranquëmahué'. A'napita imapisopita coriqui a'patë-
rinaco catahua'huanquëmaso maré'. Naporo' co inapita a'chintopirahué', a'patërinaco. ⁹Canpitataquë ya'huasoco, ma'sha pahuantopirincohué', co pi'pisha tëranta' ma'paranquëmahué'. Masitonia parti quëran huëcatona', quëtirinaco. Quisocristo imapi ni'ton, topinan ma'sha quëtirinaco nanpica'huaso maré'. Canpita ma'shanëma' co ma'paranquëmahué'. Co onporonta' nohuantaparanquë-
mahué'. ¹⁰Quisocristo catahuarinco ni'ton, no'tëquën nontaranquëma'. Co a'chinato canarahué'. Ya'ipi Acaya parti topinan a'chinarahué'. Napoaton noya cancantërahué'. Co insonta' nanitarinhué' nisha ayonquiincoso'. ¹¹“Co nosororinquëmahué' ni'ton, ma'shanëma' co ma'parinquëmahué',” itopirinënguëmahué', co no'tëquën nonpihué'. Yosë ni'sárinco, na'con nosororinquëma', tënahué'.

¹²Nisha a'china'piro'sa' a'chintohua-
chinënguëmara, coriqui ma'parinën-
quëma'. Caso nipirinhué' a'chinahuëso maré' co coriqui ma'patërahué'. Ipora huanta' topinan a'chinárahue ama

pinoinacoso marëhué'. Inapita pochin canta' ma'paranquëma' naporini, “Paono pochachin a'chintërainquëma'. Yosë a'pa-
rincoi quiyanta',” ichtënënguëmahué'. ¹³Inapitaso nipirinhué' na'con nonpintë-
rinënguëma'. “Quisocristo a'parincoi,” itopirinënguëmahué', co tëhuëenchachin a'parinhué'. Nonpintatënënguëma', a'chintarinënguëma'. ¹⁴Co ina maré' pa'yanacaso' ya'huërinhué'. Ni'co'. Satanasënta' nohuantohuachin, Yosë anquëninën pochin ya'norarin piyapi'sa' nonpintacaso maré'. ¹⁵Napoaton Satanasë natëpisopitanta' ina pochachin nisapi. “Yosë a'parincoi. No'tëquën natëcamaso maré' a'chintarainquëma',” topirinahué'. Nonpinapi ni'ton, a'na tahuëri Yosëri no'tëquën analintarin.

Paono parisitërinso'

¹⁶Naquëranchin sha'huitanta'inquëma'. “Paonoso' hua'yantërin,” toconpi a'naquën. Ama inapita natëcosohué'. Nipirinhué', pi'pian ina pochin nonto-
huatënguëma', ahuantatoma', natanco, topirahué'. Caso' noya noya ninahuëso' sha'huitaranquëma' yonquicamaso maré'. ¹⁷Co Sinioro nohuantërinhué' a'napita nocanacaso'. Nocantohua-
tëra, hua'yantërinso pochin nonëhua'. ¹⁸Nipirinhué', nisha a'china'piro'sa' ina pochin nonpi ni'ton, canta' pi'pian ina pochin sha'huichinquëma'. ¹⁹Inapi-
taso' nocanpirinënguëmahué', noya natanama' ni'quëhuarë', canta' pi'pian tëranta' natanco, topirahué'. ²⁰Inapitaso' chiníquën camairinënguëma'. Ma'sha-
nëma' topinan mapi. Nocaninënguëma', yaahuërinënguëma'. Inapotopirinënguë-
mahué', ¿ma'marëcha noya natanama nicaya? tënahué', yonquiato. ²¹Quiyaso nipirinhué' co ina pochin ninaihué'. Co chiníquën nontërainquëmahué'. Ina maré' tapanai.

Nipirinhüè', inapitaso' nocaninacoi ni'quèhuarè', canta' hua'yantèrinso pochin nonato, pi'pian nonantapata-rahüè. ²²“Quiyaso' Iprio piyapicoi,” topachinara, canta' mini Iprioco. “Israiro piyapicoi,” topachinara, canta' inachachin ninahuè. “Apraanso' shima-shonèhuèi chachin,” topachinara, inaso' shimashonèhuè canta'. ²³“Quisocristo sha'huitèrincoi ni'toi, natèrai,” itopirinenquémahuè'. ¡Caso' na'con na'con natèrahuè! Inapitaso' nocaninaco ni'ton, hua'yantèrinso pochin nonato, pi'pian inapita pochin nonchinquéma' no'tèquèn yonquicamaso marè'. Yosè marè' caso' chini chiniquèn sacatèrahuè. Pa'sá-pato, Yosè nanamèn a'chinahuè. Ina marè' na'con na'con parisitaporahuè', ahuantèrahuè. Inanta' sha'huichinquéma'. A'chinahuèso marè' na'aro' tashinan pèiquè po'morinaco. Na'aro' ahuèrinaco. Shitèparinaco. ²⁴Cotio hua'ano'sa' ana'intatonaco, chiniquèn huihuirinaco. Cara shonca iscono' huihuirinaco. Nisha nisha ninanoquè a'natèraporo' inapotèra'piarinaco. ²⁵Copirno sontaro'sanènpita naraquè chiniquèn ahuèrinaco. Cararo' inapatonaco, ana'intèrinaco. A'na tahuèri na'piquè tè'yararinaco tèpainacoso marè'. Naporahuaton, cararo' pi'pí-shachin shichimiitèrahuè. Nanchaquè marè pa'taporahuè', nancha yancominahuaton, acopoi' pa'nin. Cararo' inapora-huè. A'na tashi' nara yanponinquè matato, marèquè chachin tahuèrianpi-tèrahuè. I'huaraya huarè' cha'èrahuè. ²⁶A'chinaca'huaso marè' pa'sárahüè. Iiro'sa' panca pamatohuachina, shichi-miitèrahuè. Ihuatèro'santa' yatèpari-naco. Canta' cotio piyapico nipirahuè', cotioro'sa' no'huitonaco, yaahuèrinaco. Nisharo'santa' no'huirinaco. Panca ninanoro'saquè a'naquèn yaahuèrinaco.

Co piyapi ya'huèrinquèonta' ma'sha onporahuè. Marè pa'tohuatèra, parisitèrahuè. A'naquèn: “Quiyanta' imarai,” taponaraihuè', chiniquèn no'huirinaco. ²⁷Chiniquèn sacatápato, parisitèrahuè. Tashinta' co huè'ètorahuè', nitárahüè. Na'a tahuèri capa cosharo' ni'ton, tanarahuè, yamororahuè. Co coshata-porahuè', a'chinárahüè. A'moca'huaso' pahuantèrinco ni'ton, sèhuèn natanahuè.

²⁸Yosè nohuanton, ina pochin parisitárahüè. Naporahuaton, ya'ipi imaramasopita nosoroatènguéma', yonquíaranquéma'. Noya noya imacamaso' na'con nohuantèrahuè. Nani tahuèri yonquiatènguéma' napion cancantèrahuè. ²⁹A'naquèn co chiniquèn cancantohuachinahuè', canta' ina pochin ninatanahuè. A'na piyapi anishacancantohuachinquémara, nosororanquéma' ni'ton, ina no'huirè pochin cancantèrahuè. ³⁰A'naquènso' na'con nonsapi. “Quiyaso' noya noyaco,” topi. Caso nipirinhüè' co ina pochin nonahuè'. Co caora nanitèrahuèso' sha'huichinquéma'. Na'con ma'sha onpotopirinacohüè', Yoséichin achinicananinco ahuanta'huaso marè'. ³¹Yosè ni'sárinco, co nonpintaranquémahuè'. Inaso' Quisocristo pa'pin chachin, ya'ipiyari chinochina'. Ina ni'sárinco ni'ton, no'tèquèn nontaranquéma'. ³²Íraca Tamascoquè ya'huasoco, ninano hua'an yamaninco, copirno Aritasèri acorinso'. Tashinan pèiquè yapo'morinco ni'ton, sontaro'sa' a'parin. Nani tahuèri ninano ya'coana ni'sapi macainacoso marè'. ³³Yamapirinacohüè', imapisopita catahuarinaco cha'èca'huaso marè'. Inapa pairatopiquè huintana ya'huèrin. Ina quèran nantipiquè anohuaraimarinaco. Napotohuachinacora, cha'èrahuè. Co caora nanitopirahuè', Yosè catahuarincó, cha'èrahuè.

Paono inápaquë quënaninso'

12 ¹Co nohuantërahuë' a'napita nocana'huaso'. "Caso' noya noya piyapico," co taporahuë', pi'pian ina pochin sha'huichinquëma'. Iráca Yosë nohuanton, hua'narëso pochin ma'sha ni'nahuë. Quisocristo chachin anitotërinco'. ²Naporo' inápaquë Yosë ya'huërinquë chachin quëparinco. Nani shonca catapini pi'ipitarin quëparinco'. Hua'yanëhuëichin a'na' pa'mara. Nonëhuëro'co chachin a'na' pa'maraco. Co caso' nitotërahuë'. Yosëfchin nitotërin. ³Tëhuënchachin pantarahuë. Hua'yanëhuëichin a'na' pa'mara. Nonëhuëro'co chachin a'na' pa'maraco. Co caso' nitotërahuë'. Yosëfchin nitotërin. ⁴Yosë'pa' ya'huasoco, na'con natanpirahuë', co nanitërahuë' sha'huica'huaso'. Co Yosë nohuantërinhuë'. ⁵Noya noya nininso' anitotërinco ni'ton, nocantochináchin cancantopirahuë', tananpitërahuë. Co caora nohuanto, chiníquën nanantërahuë'. Co caora nanitërahuë' noya nica'huaso', tënahüë. ⁶"Na'con na'con nitotërahuë'," itëranquëma' naporini, no'tëquën nonchitënquëmahuë', co nonpinchitënquëmahuë'. Nipirinhüë', co ina pochin nontëranquëmahuë'. Nani nohuitëramaco. A'chintohuatënquëmara, natanamaco. Naporahuësopita ni'nama'. Inaíchin yonquiatoma', noya ni'co topirahuë'. Napoaton co aquëtë' sha'huitaranquëmahuë'.

⁷Yosë na'con na'con anitotërinco. Ina quëran ama a'napita nocana'huaso marëhuë' ina nohuanton, ma'sha onporahuë. Nahuan acoposha ohuanincoso pochin natanahuë. Co oshahuanaporahuë', Satanasë na'con aparisitërinco. ⁸Ina marë' chiníquën Siniro nontërahuë. "Catahuaco ama

parisichisohuë'," itërahuë. Cararo' ina pochin nontopirahuë'. ⁹Siniro sha'huitërinco: "Ca nohuanto, ipora huanta' parisitapiranhüë', nosoroatënquën, na'con catahuananquën. Carinquën achinicananaranquën noya ahuantamaso marë'. Co quëmaora nanitohuatanhüë', na'con na'con catahuananquën. Ma'sona tëranta' onpohuatan, co onporonta' pataranquënhüë'," itërinco. Napoaton co huachi sëtërahuë'. "Co caora nanitohuatërahuë', Quisocristo na'con na'con catahuaninco," ta'to, noya cancantërahuë. ¹⁰Napoaton co chiníquën cancantopirahuë', co pa'yanahuë'. Pinopachinacora, co no'huitërahuë'. Ma'sha pahuantopirinhüë', co ina yonquirahuë'. Quisocristo imarahüëso marë' aparisitohuachinacora, ahuantërahuë. Sacai' nipirinhüë', nóya cancantërahuë. "Co caora nanitohuatërahuë', na'con na'con catahuaninco," ta'to, chini chiníquën cancantërahuë.

Imapisopita yonquirinso'

¹¹Nisha a'china'piro'sa' pa'yatërama' ni'ton, hua'yantërinso pochin nontëranquëma'. "Paono nóya a'chintërincoi," itërama' naporini, co ina pochin canta' nonaca'huaso' ya'huë'itonhuë'. "Quiyaso' noya noyacoí," itopirinhüë', co ca quëran noya noyahuë' inahuaso'. Co caora nanitaporahuë', Quisocristo catahuaninco ni'ton, noya ninahuë. ¹²Iráca isoro'paquë nipon, a'naya a'naya huayonaton, acorin nanamën a'chinacaiso marë'. Inapitaso' na'con catahuanin. Ina nohuanton, cania'piro'sa' a'naroáchin anoyatopi. Nani ma'sha nanitapapi. Inapopi quëran acorinsopita nohuitërehüa'. Canta' acorinco ni'ton, inapochachin catahuaninco. Canpitataquë ya'huapo, cania'piro'sa' a'naroáchin anoyatërahuë.

Aparisitopirinacohuë', ahuantato, a'chintëranquëma'. "Ma noyacha Yosëri catahuarin paya," ta'toma', imarama'.¹³ A'naquënso nipirinhüë' sha'huitërinënuquëma'. "A'napita imapisopita noya noya ni'nin," itopirinënuquëmahüë', ya'ipinquëma' napopináchin ni'nanquëma'. A'na parti a'chinpato, cosharo', coriqui, inapita ma'patërahuë' capato, nanpica'huaso marë'. Canpitaíchín co ma'pachinanquëmahüë'. ¿Ina marë' no'huiramacó ti? No'huihuatamacó, jnaniantoco'!

¹⁴Nani catoro' ni'conanquëma'. Iporaso' naquëranchin nicaponquëma' yapa'sarahuë. Cantonpatënuquëma', co manta' ma'paaranquëmahüë'. Co ma'shanëma' nohuantërahuë'. Canpita noya noya imacamaso' nohuantërahuë. Hui'nahuëpita pochín ni'nanquëma'. Hui'nanpoa' co nocomarinpoahuë'. Canpoari catahuacaso' ya'huërin.¹⁵ Napoaton co manta' ma'paranquëmahüë'. Noya cancantato, sacatarahuë cosharo' pa'ana'huaso marë'. Ina quëran parisitaporahuë', a'chintëranquëma' noya imacamaso marë'. Carimaso' na'con na'con nosoropiranquëmahüë', canpitaso' co onpopinchin nosororamacohüë' topirahuë'.

¹⁶A'naquëonta' nonpinapirinaco. "Paono co ma'sha ma'papiroquëmahüë', nonpintatënuquëma', canarin," itërinënuquëma'. Co napopirahuë', napotërinënuquëma'.¹⁷ I'hua mini a'naquën a'papi-
 huë', co manta' ina quëran canarahuë'.¹⁸ "Inta, quëmari ni'coniquë' iyaro'sa'," itahuato, Tito a'parahuë. Inarë' a'na iyayanta' a'parahuë. Cantonpachinquëma', co Tito nonpintërinquëmahüë'. Canta' ina pochachin cancantërahuë. Co pi'pisha tëranta' canaraihuë'.

¹⁹Co noya nicamacoisó marë' ninshitarainquëmahüë'. A'naquëma' nimara ina

pochin yonquipiramahuë', co quiyaso naporaihuë'. Nosororainquëma' iyaro'sa'. Noya noya imacamaso marë' ninshitarainquëma'. Quisocristo imarai ni'ton, Yosëichin yonquirai. Ina ni'sárincoi ni'ton, no'tëquën ninshitarainquëma'.²⁰ Canconpato, co noya ni'saranquëmahüë' nimara. Canpitanta' co noya ni'saramacohüë' nimara. Napoaton sëtato, yonquiáranquëma'. Ipora huanta' a'naquëma' nimara nino'huiarama', nia'pitarama', iquianan quëran ninontarama', nipinosarama', ninocanarama', nisha nisha yonquiararama' nimara, ténahuë yonquiato.²¹ Iráca a'naquëma' co noyahuë' yonquirama'. Monshihuanama', sanapirachin yonquirama'. Ipora huanta' a'naquëma' inapoarama' nimara. Co ina naniantohuatamahuë', canconpato, pa'pi sëtarahüë. Carinquëma' a'chintëranquëmaso' ni'ton, Yosë atapanarinco. Co oshanëma' a'po-huatamahuë', chiniquën asëtaramaco.

Piquëran pënëntërinso'

13 ¹Nani catoro' ni'conanquëma'. Iporaso' naquëranchin nicaponquëma' pa'sarahuë. Yosë quiricanën quëran sha'huitërinpoa'. "Ama topinan quëran ana'intocosoahuë'. Natantacaso' ya'huërin. Cato' piyapihuë nipon, cara piyapihuë nipon, inachachin sha'huitohuachinpoa', naporó huarë' ana'intacaso' ya'huërin," topi. Napoaton pa'pato, ina pochín natantarahuë no'tëquën nitota'huaso marë'.² I'hua ni'conpatënuquëmara, pënënanquëma'. "Co oshanëma' naniantohuatamahuë', a'na huë'pato, no'tëquën ana'intaranquëma huachi," itëranquëma'. Iporaso' co inatohua' ya'huëpirahuë', inachachin pënëntaranquëma'. Co i'hua oshahuaninsoachin yonquirahuë'. Ya'ipinquëma' pënëntaranquëma'.³ "Chiniquën

nanantëranso' a'notocoi nitochii," itopiramacohuë'. Pa'pato, no'tëquën ana'intohuatënquëma', nitotarama'. "Quisocristori a'parin ni'ton, chiniquën nanantërin," tosarama'. Quisocristo co topinan quëran nontërinpoahuë'. Chiniquën nanantaton, ya'ipi nanitaparin. ⁴Isoro'paquë nipon, co aquëtë' chinirinhüë'. Corosëquë patanantopi. Chiminaponahuë', Tata Yosëri chiniquën nanantaton, ananpitaantarin. Quiyanta' Quisocristo pochin cancantatoi, co quiyaora chiniraihuë'. Ina acorincoi ni'ton, Yosë achinicancanincoi no'tëquën pënëna'huainquëmaso marë'.

⁵Canpitaso nipirinhüë' nitantiaco'. Canpitaora yonquinëma quëran yonquico'. A'naquëma' co cancanëma quëran huarë' imashatëramahuë' nimara. Ya'ipi cancanëma quëran imapatama', Quisocristo ya'coancantërinquëma'. ¿Co ina nitotëramahuë' ti? A'naquëmaso nipirinhüë' co tëhuëenchachin imamaranquëmahuë'. ⁶Tëhuëenchachin imapatama', co topinan quëran a'chintërainquëmahuë', tënahüë. Ina quëran canpitanta' inachachin yonquiarama'. "Tëhuëenchachin Quisocristori acorin pënënaninpoaso marë'," tosarama'. ⁷Canpita marë' Yosë nontarai. "Catahuaquë' noyasáchin niina," itërai. Co a'napita noya nicainacoiso marë' naporaihuë'. Canpita noya noya imacamaso marë' naporai. A'napita co noyahuë' yonquiapipirinacoihuë', co ina yonquiraihuë'. ⁸No'tën nanan natëcamaso marë'

catahuarainquëma'. Co nohuantëraihuë' nisha a'chinta'huainquëmaso'. ⁹Co chiniquën nanantona'pi pochin nipiraihuë', co ina marë' sëtëraihuë'. Noya imapatama', nóya cancantarai. Ipora huanta' Yosë nontarai. "Catahuaquë', Sinioro, noya noya cancanchina'," itërai. ¹⁰Napoaton co inaquë ya'huaporahuë', ninshitaranquëma' pënëna'huainquëmaso marë'. Ya'ipi co noyahuë' yonquiramasopita naniantohuatama', canconpato, co ana'inta'huainquëmaso' ya'huaponhuë'. Sinioro chachin chiniquën nanan quëtërinco catahua'huainquëmaso marë'. Co anishacancanta'huainquëmaso marë' napotaranquëmahuë'. Noya noya imacamaso marë' napotaranquëma'.

¹¹Nani iyaro'sa' ninshitërainquëma'. Noya cancantoco', tënahüë. Ya'ipi cancanëma quëran Yosë imaco'. Pënënanquëmaso' noya natëtoma', niachinicancanco'. Napopináchin yonquico'. Noya nini'toma', ya'huëco'. Inapohuatama', Yosë catahuarainquëma'. Inasáchin nosoroatonpoa', catahuarainpoa' sano cancantacaso marë'. ¹²Noya ninosoroatoma', imaramasopita capini nisë'quëco'. ¹³Ya'ipi imapisopita isëquë ya'huëpiso', saludos a'patarinëinquëma'.

¹⁴Inaora nohuanton, Sinioro Quisocristo catahuainquëma'. Tata Yosë nosoro'inquëma'. Ispirito Santo chachin nani tahuëri noya ayonquiquëma'. Nani huachi.

Paono